

Ministère de l'Agriculture, de l'Alimentation et de la Viticulture	8
Référence :	
11 AOUT 2025	
A traiter par	
Copie à	

Här Claude Wiseler
President vun der Chamber

Lëtzebuerg, den 30. Juli 2025

Här President,

Esou ewéi den Artikel 80 vum Chambersreglement et virgesäit, biede mir Iech dës parlamentaresch Fro un den Här Ëmweltminister weiderzeginn.

D'Pflanzenaart *Cyperus esculentus*, bekannt als Erdmandelgras, stamt ursprénglech aus Afrika respektiv aus Westasien. D'Onkraut huet sech méttlerweil och an Europa ausgebreet. An de leschte Joren ass et an e puer europäesche Länner als besonnesch invasiivt an agrarwirtschaftlech problematescht Gewächs erkannt ginn. Dës Aart breet sech haaptsächlech iwwer Knëllercher séier aus a gëllt als resistent géint déi gängeg Bekämpfungsmëttel. D'Bekämpfung ass deier an zäitintensiv, besonnesch wann de Befall net fréi erkannt gëtt. A verschiddenen Nopeschlänner gëtt *Cyperus esculentus* als Gefor fir d'Ertrag an d'Biodiversitéit ugesinn. An dësem Kader wollte mir déi follgend Froen un den Här Ëmweltminister stellen:

- Ass d'Aart *Cyperus esculentus* zu Lëtzebuerg schonn offiziell detektéiert ginn?
 - Wa jo, wéini a wou genau?
 - Wa jo, wat fir Schied bei den Ertrag oder bei der Biodiversitéit sinn zu Lëtzebuerg bis elo duerch d'Aart dokumentéiert ginn?
- Ginn et national Moossnamen, fir dës invasiv Aart z'identifizéieren, ze kontrolléieren oder ze bekämpfen?
- Sinn Informatiounscampagnë geplangt, fir d'Bauern ze sensibiliséieren?

Här President, mir bidden Iech, eisen déifste Respekt unzehuelen.

Jeff Boonen, Deputéierten

Octavie Modert, Deputéiert



Gemeinsam Äntwert vum Minister fir Ëmwelt, Klima a Biodiversitéit an vun der Ministesch fir Landwirtschaft, Ernährung a Wäibau op d'parlamentaresch Fro n°2702 vum 30. Juli 2025 vum den éierewäerten Deputéierten Octavie Modert a Jeff Boonen iwwert d'Erdmandelgras

1. Ass d'Aart *Cyperus esculentus* zu Lëtzebuerg schonn offiziell detektéiert ginn?

1.1. Wa jo, wéini a wou genau?

Jo, an enger Bamschoul konnt d'Virkomme vun der Erdmandel (*Cyperus esculentus*) de 27. August 2024 vun engem Expert confirméiert ginn.

1.2. Wa jo, wat fir Schied bei den Ertrëg oder bei der Biodiversitéit sinn zu Lëtzebuerg bis elo duerch d'Aart dokumentéiert ginn?

Bis elo gouf et zu Lëtzebuerg kee finanziellen Opwand deen duerch dat manuellt Erausrappe vun der Planz entstan ass.

De negativen Impakt vun der Erdmandel op d'Biodiversitéit gëtt éischter als marginal agestuuft. D'Aart ass haaptsächlech dofir bekannt a landwirtschaftleche Kulture fir ekonomesch Schied ze suergen.

2. Ginn et national Moossnamen, fir des invasiv Aart ze identifizéieren, ze kontrolléieren oder ze bekämpfen?

Dës Aart gëtt vun der EPPO (European and Mediterranean Plant Protection Organisation) als invasiven Neophytt gefouert. Am "European Alien Species Information Network" gëtt si ënnert der EASIN ID: R04713 als "Alien species with impact" beschriwwen, mee zu dësem Zäitpunkt gëtt si weeder am Europäesche Règlement 1143/2014¹ nach am EU-Règlement 2016/2031² als reglementéierten „Schuedorganismus“ opgelëscht.

Wann dës Aart momentan enzwousch festgestallt gëtt an d'Autoritéiten informéiert ginn, kënnen si berodend intervenéieren. Et gouf am Kader vum Éischtnoweis eng wëssenschaftlech a praktesch Begleedung am Optrag vum Ministère fir Ëmwelt, Klima a Biodiversitéit, fir d'Aart lokal an effikass ze bekämpfen, dëst fir ze verhënneren datt d'Planz sech weider verbreet.

Et gëllt ze rappeléieren datt weiderhin d'Ausbezuelen vun de PAC-Hëllefen un d'Respektéiere vun de Grundufuerderunge fir d'Betriebsfeierung an d'Standarden fir de gudden landwirtschaftlechen an ökologesche Zoustand (GLOZ) gebonnen ass.

¹ Règlement (UE) No 1143/2014 du 22 octobre 2014 relatif à la prévention et à la gestion de l'introduction et de la propagation des espèces exotiques envahissantes.

² Règlement (UE) 2016/2031 du Parlement européen et du Conseil du 26 octobre 2016 relatif aux mesures de protection contre les organismes nuisibles aux végétaux

Et ass virgesinn d'Ermandelgras am Kader vum GLOZ 8 („Erhalt vun net-produktiven Landschaftselementer a Flächen zur Verbesserung vun der Biodiversitéit“) op d'Lëscht vun Aarten ze setzen déi obligatoresch musse bekämpft ginn.

3. Sinn Informatiounscampagne geplangt, fir d'Bauern ze sensibiliséieren?

D'Erfahrung vum Ëmgang mam Éischtnoweis ka genotzt gi fir de landwirtschaftleche Secteur an Zukunft ze informéieren. De Landwirtschaftsministère plangt eng Informatiounscampagne fir d'Betriber ze sensibiliséieren a wäert e Monitoring op ufällege Flächen en place setzen.

Lëtzebuerg, den 30. September 2025
(s.) Serge Wilmes
Minister fir Ëmwelt, Klima a Biodiversitéit